


21 APRILIE

**CANONUL
SF. PREOT
ALEXIE
GNEUȘEV
DE LA
BORTSURMANI**



MINEIUL PE APRILIE-RU



Канон святому праведному Алексию Бортсурманскому

Канон, глас 4 Песнь 1

Ирмос: Моря чермную пучину невлажными стопами, древний пешешествовав Израиль, крестообразными Моисеовыми руками Амаликову силу в пустыни победил есть.

Чувства моя и ум утверди, Спасителю Мой, да возмогу достойне воспети молитвы и подвиги возлюбльшаго Тя и Тобою возлюбленного служителя Твоего, отца нашего Алексия.

От Господа видением Ангела вразумленный, путь хладный спасения ради оставил еси, светлостью Креста озаряем, греховныя мглы избега еси, Спасителю Богу молитвы и пения вознося непрестанно, блаженне.

Якоже Илия колесницею огненною, тако и ты колесницею добродетелей на небо возшел еси. Отонудуже низпослати и нам жития исправление Господа умоли.

Богородичен: **Ж**изнь вечную Тобою, Богородице Дево, прияхом, иже жизни райския некогда лишившийся, зане родила еси Единого безначального и вся оживотворяющего.

Песнь 3

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище, и утверждение.

И нравом причастник и житием подражатель Ангелом быв, богодухновенне, слово Истины до конца исправил еси.

Зрительно Царствия Небеснаго бе душевное око твое, понеже чисто бысть, сего ради житие светле управил еси, еже чтуще о Бозе, ты прославляем.

Всяко изобилие благих тебе Христос даровав, верх божественных дарований, отче праведне, показа ты, судом праведным, богоявление, праведный Един.

Богородичен: Вся свет еси, Владычице, вся святыня, вся благодать, вся премудрость, вся можеши, яко Мати Всемогущаго, Едина и Та же Всесовершенна, яко Мати Всесовершеннаго Царя славы.

Седален, глас 8:

Плач многих о гресех к Престолу вышнему вознося, некое приклонение во святей Литургии духом созерцая, деяние и проповедание неразрывна имый, твоими делы и чудесы Саровскому чудотворцу сотаинник явился еси, Алексие блаженне, Нижеградския земли светильниче, молися о душах наших.

Песнь 4

Ирмос: Вознесена Ты видевши Церковь на Кресте, Солнце праведное, ста в чине своем, достойно взывающи: слава силе Твоей, Господи.

Основание твердо Христа имея, во страннолюбии Аврааму древнему уподобился еси, отвсюду к тебе приходящая приемля и Господу тех приводя, и тако угодная Богу творил еси.

Храм Богу сердце твое хотя устроить, в дому Божиим непрестанно служить возжелел еси, украшая душу твою небесными добротами.

Росою подвигов твоих вся страсти телесныя угасив, возжег еси просвещение безстрастия, темже и сын вечнаго дне явился еси, отче блаженне.

Богородичен: Иезекииль божественный, Пречистая, врата заключенна пронарече Тя, имиже пройде неразтворенно Единый Превечный, мир Свой нам подавая.

Песнь 5

Ирмос: Ты Господи мой, Свет в мир пришел еси, Свет святыи, обращали из мрачна неведения верою воспевающия Тя.

Сподобился еси вышних дарований, отче, Господу Твоему непрестанно служа и апостольския труды присно подражая.

Тленные твоя плоти сладострастие умертвив, душу нетленную благочестием оживил еси и сию дом Духа Божественнаго сотворил еси.

Евангелие Христово всем усердно проповедавая, трапезы Господни причастник повседневный был еси, сам себе и паству твою, яко жертву живу и святу, Богови устрояя.

Богородичен: Единого от Троицы родила еси. Пречистая, милосердия ради на земли являшагося во

двою естеству, Егоже непрестанно моли спасти души наша.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися, ради милости от ребр Твоих истекшею Кровию.

Маслина плодовита в дому Господа Твоего был еси, Алексие блаженне, зане ведение Божественное Господь дарова ти и в делании праведнем укрепи тя.

Вещей студнаго явления отвратился еси, отче праведне, невестествен же Свет видети сподобился еси, Божества вид, приимшаго вещь человечества, блаженне Алексие.

Житие твое свято и слово твое, блаженне, благодати исполнено, сердце твое молитвы благодатныя сосуд бысть, сего ради верою и любовью ты почитаем.

Богородичен: Естество Ангельское удивися еже о Тебе чудеси неизреченному, Пресвятая Дево: како убо плоть восприят от Тебе, Иже безплотен Сый и вся содержи?

Кондак, глас 4:

К пресвитерству усердному видением Ангела призванный, пастырь дивный Церкви Христовы явился еси, праведне отче наш Алексие. Моли Христа Бога нашего, грехов оставление нам даровати и с тобою в Царствии Божиим быти.

Песнь 7

Ирмос: В пещи Авраамстии отроцы персидстей
любовию благочестия паче, нежели пламенем
опаляеми, взываху: благословен еси в храме славы
Твоя, Господи.

Промыслом Божиим свет благочестия явился еси отче
Алексие, вся призывая вещати: благословен еси в
Церкви Славы Твоя, Господи.

Образ Божий человек есть, ты же, отче Алексие,
зерцало любве Божия пресветло был еси и дом Святыя
Троицы, Юже и мы грешнии прославляем.

От Господа благодать приял еси, во еже недуги и
страсти исцеляти человеком, тою и нас присно
посещай, да вси с тобою единомудренно поем:
благословен еси, Господи Боже, во веки.

Богородичен: Владычице, спаси род Твой, спаси
единокровныя Твоя. Спаси ны, Мати Живота и всего
рода человека, аще и недостойни есмы Тя Матерь себе
нареци: освяти, утверди и спаси нас молитвами
Твоими.

Песнь 8

Ирмос: Руце распростер Даниил, львов зияния в рове
затче: огненную же силу угасиша, добродетелию
препоясавшися, благочестия рачители отроцы,
взывающе: благословите, вся дела Господня, Господа.

Очисти сердца и мысли наша молитвами твоими и
яко землю плодоносну покажи ны, да добродетелию
препоясавшися, зовем: благословите, вся дела
Господня, Господа.

Венцем благодатных даров венчался еси, премудрость

вышшую созерцая и присно зовый: благословите, вся дела Господня, Господа.

Троицен: Слава Тебе, Всесвятой Животворящий Душе, от Отца исходяй и в Сыне присно почиваяй, Слава Тебе, Сыне Божий, Святым Духом освящай, укрепляй и умудряй нас, Слава Тебе, Отче, благоволяй о нас присно Духом Святым, нераздельная Троице Единице, помилуй нас.

Богородичен: Спасения всех Ходатаицу, являющуюся человеком и мир просвещшую сиянии боговидных чистоты, в песнях величаем.

Песнь 9

Ирмос: Камень нерукосечный от несекомья горы, Тебе Дево, краеугольный отсечеся Христос, совокупивый разстоящаяся естества. Тем веселящеся Тя, Богородице, величаем.

Воистинну свет миру был еси, отче святой, божественными бо дела душу удоблив, пастырь изряден православных Церкви явился еси, всем верным образ быв словом и житием, сего ради тя ублажаем.

Единаго Содетеля, Имже и о Немже всяческая во всех, выну предзря пред умом. Тому чистым сердцем и неблазненною душею всем житием твоим поработал еси, яко Господу Своему, работе мамоне никакоже приразився.

Князи восхвалиша и народ мног прослави тя, ты же славу земную презрев, в вечных обителях Божиих возжелал еси быти и тамо прославляти Господа во веки.

Богородичен: Лестию древле благожребия праотцы
изгна змий. Ты же сих, Мати Божия, воззвала еси.
Благословен, Пречистая, Плод чрева Твоего.

[Текст канона святому праведному иерею Алексию
Гнеушеву воспроизводится по изданию: Канон,
акафист, житие святому праведному Алексию
Бортсурманскому чудотворцу. Издание храма в честь
Успения Пресвятой Богородицы с. Бортсурманы,
2004. Текст канона на стр. 3 – 9 и 30 – 34]

